



Broj: X-K/05/10

Sarajevo, 24.03.2006. godine

Cuspek za sudu		138
X. K/05/10		
30-03-2006	10	12/10

U IME BOSNE I HERCEGOVINE!

Sud Bosne i Hercegovine, u vijeću sastavljenom od sudija Šabana Maksumića, kao predsjednika vijeća, Mirze Jusufovića i Malcolm Simmonsa kao članova vijeća, uz sudjelovanje pravnog saradnika Sanina Bogunića kao zapisničara, u krivičnom predmetu protiv optuženog Miloša Antonića, zbog krivičnog djela organizovani kriminal iz člana 250. stav 2. Krivičnog zakona Bosne i Hercegovine, u vezi sa krivičnim djelima: zloupotreba položaja ili ovlaštenja iz člana 383. stav 3. Krivičnog zakona Federacije Bosne i Hercegovine, krivotvorenje službene isprave iz člana 389. Krivičnog zakona Federacije Bosne i Hercegovine, pranje novca iz člana 209. stav 2. Krivičnog zakona Bosne i Hercegovine, porezna utaja iz člana 210. stav 2. Krivičnog zakona Bosne i Hercegovine, a u vezi sa članom 31. Krivičnog zakona Bosne i Hercegovine, odlučujući o optužnici Tužilaštva Bosne i Hercegovine broj KT-193/05 od 09.02.2006. godine potvrđenoj dana 10.02.2006. godine, nakon održanog pretresa za izricanje krivičnopravne sankcije, a po prihvatanju izjave o priznanju krivnje, u prisustvu tužioca Tužilaštva Bosne i Hercegovine Bože Mihajlovića, optuženog Miloša Antonića i njegovog branioca Aide Husić, advokata iz Sarajeva, dana 24.03.2006. godine donio je i javno objavio sljedeću:

P R E S U D U

Optuženi ANTONIĆ MILOŠ, sin Pantelije i majke Ivanke, rođen 14.08.1960. godine u mjestu Trbušnica, opština Loznica, nastanjen u Loznici u ulici Klupci Drinskih Divizija 47 A, Srbin, državljanin Srbije i Crne Gore, posjeduje JMBG: 1408960773619 i putnu ispravu broj 004577448 izdata od MUP-a Loznica, po zanimanju radnik, sa završenom SSS, oženjen, otac dvoje djece, lošeg imovnog stanja, do sada nije osuđivan, nalazi se u pritvoru u pritvorskoj jedinici KPZ "Kula"-Istočno Sarajevo, po rješenju Suda Bosne i Hercegovine br.X-K/05/10 od 24.03.2006. godine.

KRIV JE

Što je:

Optuženi AntoniĆ Miloš je, kao stvarni vlasnik i kao jedina ovlaštena i odgovorna osoba za zastupanje preduzeća "Antony Company" d.o.o Sarajevo koje je registrovao kao pravnu osobu na osnovu člana 2. i 311. Zakona o privrednim društvima Federacije Bosne i Hercegovine kod nadležnog Kantonalnog suda u Sarajevu kao privredno društvo za proizvodnju, trgovinu, promet i usluge sa sjedištem u Sarajevu na adresi Ul. Stupska bb opština Ilidža Rješenjem br.UF/I-238/05 od 22.02.2005. godine i kao poreznog obveznika kod nadležne porezne uprave sa identifikacijskim brojem 4201003380009; postupajući u ime preduzeća "Antony Company" d.o.o. Sarajevo zloupotrijebio ovlaštenja ovlaštene i odgovorne osobe da bi za sebe pribavio nezakonitu imovinsku korist, tako da je organizovao nezakonito poslovanje preduzeća "Antony Company" d.o.o. Sarajevo sa drugim preduzećima i fizičkim osobama koji imaju ovlaštenja da se bave trgovinom, tako da se dogovorio sa ovlaštenim i odgovornim osobama drugih preduzeća i to: "Kafa prom" d.o.o. Sarajevo sa sjedištem na adresi Olimpijska br. 21, Sarajevo; "Granini" d.o.o. Sarajevo sa sjedištem na adresi Oteškog bataljona br. 79 i 107, Sarajevo; "Pink" d.o.o. Zenica sa sjedištem na adresi Sarajevska br. 92, Zenica; "Jubil" d.o.o. Sarajevo sa sjedištem na adresi Sarači br. 77, Sarajevo; "Vik" d.o.o. Busovača sa sjedištem na adresi Nikole Šubića b,b Busovača i na adresi Gudelji bb, Busovača; "Jasa" d.o.o. Kakanj sa sjedištem na adresi Lake brigade bb, Kakanj, da će za ugovorenu novčanu naknadu-proviziju koju će mu isplaćivati u gotovom novcu ovlaštene i odgovorne osobe navedenih preduzeća, zajedno sa njima organizovati nezakonito poslovanje njihovih preduzeća sa njegovim preduzećem "Antony Company" na način:

- *da će međusobno dogovorenim i međusobno povezanim radnjama stvarno poslovanje-promet robe koji su ostvarila preduzeća tih odgovornih osoba (navedena preduzeća) stvarnom prodajom robe njima poznatim kupcima koji su robu preuzeli ili će robu tek preuzeti kroz maloprodaju ili veleprodaju protivno zakonom propisanim uvjetima pod kojim se može obavljati trgovina na malo i trgovina na veliko (Zakon o privrednim društvima FBiH-Službene novine FBiH br.23/99, Zakon o izmjenama i dopunama Zakona o privrednim društvima FBiH-Službene novine FBiH br.29/03, Zakon o trgovini FBiH-Službene novine FBiH br.64/04, Zakon o porezu na promet proizvoda i usluga-Službeni Glasnik BiH br. 62/04 i*

Pravilnik o primjeni zakona o porezu na promet proizvoda i usluga- Službeni Glasnik BiH br.63/04) lažnim narudžbenicama sa izjavama, lažnim računima i lažnim otpremnicama fiktivno-lažno iskazati kao promet robe, koja podliježe obavezi obračuna i plaćanja poreza i drugih davanja, ostvaren kroz veleprodaju preduzeća tih odgovornih osoba (navedenih preduzeća) kao dobavljača prema preduzeću "Antony Company" d.o.o. Sarajevo kao kupcu s ciljem daljnje prodaje od strane preduzeća "Antony Company" d.o.o. Sarajevo, a taj fiktivni-lažni promet će fiktivno-lažno pokriti lažnim računima, lažnim otpremnicama i lažnim izjavama o kompenzaciji kao nabavku robe koja u tom momentu ne podliježe obavezi obračuna i plaćanja poreznih i drugih davanja (ranije plaćen porez ili je roba oslobođena poreza) ostvaren kroz veleprodaju preduzeća "Antony Company" d.o.o. Sarajevo kao dobavljača prema preduzećima tih odgovornih osoba (navedena preduzeća) kao kupcima, zatim:

- *da se međusobno dogovorenim i međusobno povezanim radnjama stvarno poslovanje-priliv gotovog novca koji su ostvarila preduzeća tih odgovornih osoba (navedena preduzeća) prodajom robe za gotov novac njima poznatim kupcima koji su robu platili kroz maloprodaju ili veleprodaju protivno zakonom propisanim uvjetima pod kojim se može obavljati trgovina na malo i trgovina na veliko, fiktivno-lažno iskazuju kao prihod preduzeća "Antony Company" d.o.o. Sarajevo polaganjem tog novca na transakcijske račune preduzeća "Antony Company" d.o.o. Sarajevo otvorene kod više banaka u Sarajevu, a zatim fiktivno-lažno iskazuju kao prihod preduzeća tih odgovornih osoba – navedenih preduzeća - ostvaren kroz fiktivnu veleprodaju sa preduzećem "Antony Company" d.o.o. Sarajevo žiralnim plaćanjem preduzeća "Antony Company" d.o.o. Sarajevo kao kupca preduzećima tih odgovornih osoba kao dobavljačima,*

a sve sa ciljem da preduzeća tih odgovornih osoba (navedena preduzeća) kao dobavljači materijalno razduže robu i prenesu obavezu obračuna i plaćanja poreza i drugih davanja na preduzeće "Antony Company" d.o.o. Sarajevo kao kupca, koji robu kupuje s ciljem daljnje prodaje i tako utaje porez, i sa ciljem da preduzeća tih odgovornih osoba novac pribavljen nezakonitim poslovanjem suprotno propisanim uvjetima pod kojim se može obavljati trgovina na malo i trgovina na veliko vrate u privredni opticaj kao zakonito ostvaren prihod bez obaveze obračuna i plaćanja poreznih i drugih davanja pa su tako optuženi Antoni Miloš i ovlaštene i odgovorne osobe navedenih preduzeća zajedno djelovale kao organizirana grupa ljudi u smislu člana 1. stav 17. Krivičnog zakona Bosne i Hercegovine, te je optuženi Antoni Miloš djelujući kao

pripadnik ove organizovane grupe izvršavajući dogovorene radnje u periodu od februara 2005. godine do septembra 2005. godine izvršio:

- 1. Po prethodno opisanom dogovoru sa odgovornim osobama navedenih preduzeća kao ovlaštena i odgovorna osoba u ime preduzeća "Antony Company" d.o.o. Sarajevo sačinio fiktivne-lažne narudžbenice za robu sa izjavom da naručena roba služi za daljnju prodaju na način da je narudžbenice i izjave samo potpisao i ovjerio pečatom svog preduzeća bez naznake ostalog sadržaja u narudžbenici koji narudžbenica mora sadržavati sukladno zakonskim propisanim uvjetima pod kojima se može obavljati trgovina na malo i trgovina na veliko (tzv. bjanko narudžbenice) te je takve narudžbenice sa izjavom predao ovlaštenim i odgovornim osobama navedenih preduzeća, nakon čega su ovlaštene i odgovorne osobe navedenih preduzeća sačinile fiktivne-lažne račune, fiktivne-lažne otpremnice koje je dijelom optuženi Antonić Miloš potpisao i ovjerio pečatom preduzeća "Antony Company" d.o.o. Sarajevo, te su u pribavljene bjanko narudžbenice sa izjavom upisali nedostajući sadržaj identičan sadržaju u lažnim računima i sadržaju u lažnim otpremnicama, pa su sve ove fiktivne i lažne dokumente upotrijebile kao dokaz da su preduzeća tih odgovornih osoba (navedena preduzeća) kao dobavljači preduzeću "Antony Company" d.o.o. Sarajevo kao kupcu prodali i isporučili robu i da je optuženi Antonić Miloš lično preuzeo robu, iako stvarni promet robe sa preduzećem "Antony Company" d.o.o. Sarajevo nije ostvaren već su njihova preduzeća kroz svoju maloprodaju ili veleprodaju protivno uvjetima pod kojim se može obavljati trgovina na malo i trgovina na veliko prodali robu drugim njima poznatim kupcima koji su robu stvarno preuzeli ili će robu tek preuzeti pa je na opisani način optuženi Antonić Miloš u peirodu od februara 2005. godine do septembra 2005. godine lično potpisao i u ime preduzeća "Antony Company" d.o.o. Sarajevo pečatom ovjerio lažne narudžbenice sa izjavom i lažne otpremnice neistinitog sadržaja te omogućio odgovornim i ovlaštenim osobama navedenih preduzeća da pribave i sačine lažne poslovne isprave-dokumente i upotrijebe lažne poslovne isprave-dokumente kao dokaz da su kao dobavljači materijalno razdužili svoju robu i kao dokaz da su obavezu obračuna i plaćanja poreznih i drugih davanja prenijeli na preduzeće "Antony Company" d.o.o. Sarajevo kao kupca u ukupnoj vrijednosti robe 716.733,69 KM i to: "Kafa prom" d.o.o. Sarajevo u iznosu od 204.278,55 KM, "Juhil" d.o.o. Sarajevo u iznosu od 329.696,75 KM, "Granini" d.o.o. Sarajevo u iznosu od 141.384,69 KM, "Jasa" d.o.o. Kakanj u iznosu od 11.397,48 KM, "Vik" d.o.o. Busovača u iznosu od*

11.130,02 KM i "Pink" d.o.o. Zenica u iznosu 18.946,20 KM, pri čemu je optuženi *Antonić Miloš* postupao sa umišljajem da ni njegovo preduzeće "Antony Company" d.o.o. Sarajevo neće izvršiti obračun i plaćanje poreznih i drugih davanja, te je omogućio ovlaštenim i odgovornim osobama navedenih preduzeća da postupajući u ime navedenih preduzeća njihova preduzeća izbjegnu plaćanje poreznih i drugih davanja u ukupnom iznosu od 70.799,01 KM i to: "Kafa prom" d.o.o. Sarajevo u iznosu od 20.427,85 KM, "Jubil" d.o.o. Sarajevo u iznosu od 32.969,67 KM, "Granini" d.o.o. Sarajevo u iznosu od 13.253,23 KM, "Jasa" d.o.o. Kakanj u iznosu od 1.139,86 KM, "Vik" d.o.o. Busovača u iznosu od 1.113,00 KM i "Pink" d.o.o. Zenica u iznosu 1.894,62 KM, a istovremeno je optuženi *Antonić Miloš* na temelju učinjenih radnji za sebe pribavio neutvrđenu imovinsku korist i pričinio štetu proračunu Bosne i Hercegovine i Federacije Bosne i Hercegovine u iznosu od 70.799,01 koja predstavlja iznos utajenog poreza.

2. Po prethodnom dogovoru sa ovlaštenim i odgovornim osobama navedenih preduzeća, optuženi *Antonić Miloš* je na neutvrđen način od tih odgovornih osoba ili njihovih posrednika preuzimao gotov novac, koji su njihova preduzeća ostvarila kroz maloprodaju ili veleprodaju protivno propisanim uvjetima pod kojim se može obavljati trgovina na malo i trgovina na veliko naplatom od njima poznatih kupaca koji su kupljenu robu stvarno i preuzeli, a zatim je optuženi *Antonić Miloš* ovaj novac polagao kao ostvareni promet-prihod svoga preduzeća "Antony Company" d.o.o. Sarajevo na transakcijske i devizne račune otvorene kod više banaka na području Sarajeva i to: kod Raiffeisen banke Sarajevo, transakcijski račun broj 1610000047990082 i devizni račun broj 5020112000-0001773; kod LT Gospodarske banke Sarajevo transakcijski račun broj 170-111-2000380041; kod UNI Kredit Zagrebačke banke Sarajevo transakcijski račun broj 22-32-00465-5; kod HVB Central profit banke Sarajevo transakcijski račun broj 1291079401727911; kod Zepter komerc banke AD Banja Luka, Filijala Sarajevo transakcijski broj 5673831101871098 i kod Vakufske banke Sarajevo transakcijski račun broj 1602000022803753, iako je znao da preduzeće "Antony Company" d.o.o. Sarajevo nije stvarno ostvarilo taj promet-prihod već je novac pribavio na nezakonit način izvršenjem krivičnih djela koje je dogovorio sa ovlaštenim osobama navedenih preduzeća, pa je na opisani način u periodu od februara 2005. godine do septembra 2005. godine od ovlaštenih osoba navedenih preduzeća primio i kao promet-prihod preduzeća "Antony Company" d.o.o. Sarajevo na transakcijske račune položio ukupno 379.556,48 KM.

3. Po prethodnom dogovoru sa ovlaštenim i odgovornim osobama navedenih preduzeća, optuženi **Antonić Miloš** je novcem koji je na prethodno opisani način prikazao kao prihod preduzeća "Antony Company" d.o.o. Sarajevo sa transakcijskih računa preduzeća "Antony Company" d.o.o. Sarajevo plaćao fiktivne račune ili avanse na transakcijske račune navedenih preduzeća iako je znao da preduzeće "Antony Company" d.o.o. Sarajevo sa tim preduzećima nije imalo nikakvog stvarnog prometa već je plaćanje vršio radi izvršenja krivičnih djela koja je dogovorio sa ovlaštenim i odgovornim osobama navedenih preduzeća, čime je omogućio ovlaštenim i odgovornim osobama tih preduzeća da novac pribavljen nezakonitim poslovanjem suprotno propisanim uvjetima pod kojim se može obavljati trgovina na malo i trgovina na veliko vrata u privredni opticaj kao zakonito ostvaren prihod bez obaveze obračuna i plaćanja poreznih i drugih davanja pa je na opisani način u periodu od februara 2005. godine do septembra 2005. godine izvršio plaćanje u ukupnom iznosu 370.344,20 KM i to: "Kafa prom" d.o.o. Sarajevo u iznosu od 175,049,50 KM, "Jubil" d.o.o. Sarajevo u iznosu od 16.800,00 KM, "Granini" d.o.o. Sarajevo u iznosu od 137.618,59 KM, "Jasa" d.o.o. Kakanj u iznosu od 10.800,00 KM, "Vik" d.o.o. Busovača u iznosu od 11.130,00 KM i "Pink" d.o.o. Zenica u iznosu 18.946,20 KM.

Dakle, da je kao pripadnik organizirane grupe ljudi u smislu člana 1. stav 17. Krivičnog zakona Bosne i Hercegovine:

- zastupajući preduzeće "Antony Company" d.o.o. Sarajevo, a radi pribavljanja nezakonite novčane koristi za sebe, a ne u korist preduzeća "Antony Company" d.o.o. Sarajevo zloupotrijebio ovlaštenja koja je imao kao ovlaštena i odgovorna osoba preduzeća "Antony Company" d.o.o. Sarajevo;
- u ime preduzeća "Antony Company" d.o.o. Sarajevo kao ovlaštena i odgovorna osoba preduzeća "Antony Company" d.o.o. Sarajevo potpisao i pečatom preduzeća "Antony Company" d.o.o. Sarajevo ovjerio lažne-krivotvorene poslovne isprave i omogućio ovlaštenim i odgovornim osobama njihovih preduzeća (navedena preduzeća) da lažno iskažu poslovanje svojih preduzeća s ciljem izbjegavanja obračuna i plaćanja poreznih i drugih davanja u korist svog preduzeća
- postupajući u ime preduzeća "Antony Company" d.o.o. Sarajevo kao ovlaštena i odgovorna osoba preduzeća "Antony Company" d.o.o. Sarajevo pomogao ovlaštenim i odgovornim osobama drugih preduzeća

da novac pribavljen i korišten u nezakonitom i dogovorenom poslovanju vrata u privredni opticaj kao zakonito ostvaren promet novca s ciljem izbjegavanja obračuna i plaćanja poreznih i drugih davanja;

- *postupajući u ime preduzeća "Antony Company" d.o.o. Sarajevo kao ovlaštena i odgovorna osoba preduzeća "Antony Company" d.o.o. Sarajevo primio i koristio u privrednom poslovanju preduzeća "Antony Company" d.o.o. Sarajevo novac pribavljen na nezakonit način izvršenjem krivičnih djela koje je dogovorio sa ovlaštenim i odgovornim osobama njihovih preduzeća (navedena preduzeća).*

Čime je počinio krivično djelo organizovani kriminal iz člana 250. stav 2. Krivičnog zakona Bosne i Hercegovine u vezi sa krivičnim djelima zloupotrebe položaja ili ovlaštenja iz člana 383. stav 3. Krivičnog zakona Federacije Bosne i Hercegovine, krivotvorenja službene isprave iz člana 389. Krivičnog zakona Federacije Bosne i Hercegovine, pranja novca iz člana 209. stav 2. Krivičnog zakona Bosne i Hercegovine, porezne utaje iz člana 210. stav 2. Krivičnog zakona Bosne i Hercegovine, a u svezi sa članom 31. Krivičnog zakona Bosne i Hercegovine.

Pa ga Sud, uz primjenu navedenog zakonskog propisa, te članova 39., 42. i 48. Krivičnog zakona Bosne i Hercegovine

OSUĐUJE

NA KAZNU ZATVORA U TRAJANJU OD 5 (PET) GODINA

Na osnovu člana 56. Krivičnog zakona Bosne i Hercegovine, optuženom će se u izrečenu kaznu zatvora uračunati vrijeme provedeno u pritvoru, počev od 15.09.2005. godine, pa nadalje.

Na osnovu člana 188. stav 4. Zakona o krivičnom postupku Bosne i Hercegovine, optuženi se oslobađa dužnosti plaćanja troškova krivičnog postupka.

Na osnovu člana 110 .stav 1. Krivičnog zakona Bosne i Hercegovine, od optuženog Antonić Miloša oduzma se novčani iznos od 10.540,00 KM koji se

nalazi na transakcijskom računu preduzeća „Antony Company“ d.o.o. Sarajevo br.1610000047990082 otvorenog kod Raiffeisen banke Sarajevo, a koji je privremeno oduzet po naredbi Suda BiH.

Obrazloženje

Tužilaštvo Bosne i Hercegovine, svojom optužnicom broj KT-193/05 od 09.02.2006. godine koja je potvrđena dana 10.02.2006. godine, optužilo je Antonić Miloša da je, radnjama opisanim u optužnici, počinio krivično djelo organizovani kriminal iz člana 250. stav 2. Krivičnog zakona Bosne i Hercegovine u vezi sa krivičnim djelima zloupotrebe položaja ili ovlaštenja iz člana 383. stav 3. Krivičnog zakona Federacije Bosne i Hercegovine, krivotvorenja službene isprave iz člana 389. Krivičnog zakona Federacije Bosne i Hercegovine, pranja novca iz člana 209. stav 2. Krivičnog zakona Bosne i Hercegovine, porezne utaje iz člana 210. stav 2. Krivičnog zakona Bosne i Hercegovine, a u svezi sa članom 31. Krivičnog zakona Bosne i Hercegovine.

Optuženi se, pred sudijom za prethodno saslušanje ovog Suda, u prisutnosti svog branioca i tužioca, dana 02.03.2006. godine izjasnio da je kriv po svim tačkama optužnice.

Dana 21.03.2006. godine zakazano je ročište za razmatranje izjave o priznanju krivnje optuženog Miloša Antonića, na kojem je, u smislu člana 230. stav 1. Zakona o krivičnom postupku Bosne i Hercegovine, utvrđeno da se do izjave o priznanju krivnje došlo dobrovoljno, svjesno i sa razumijevanjem, nakon što je optuženi upoznat o mogućim posljedicama priznanja, uključujući posljedice vezane za imovinsko-pravni zahtjev i troškove krivičnog postupka. Optuženi je, takođe, svjesno i dobrovoljno prihvatio činjenicu da se, priznanjem krivice odriče prava na suđenje, što podrazumjeva završetak krivičnog postupka bez održavanja glavnog pretresa. Nakon toga, sud je utvrdio da je Tužilaštvo, uz optužnicu, prezentovalo dovoljno dokaza o krivnji optuženog, odnosno o postojanju elemenata krivične odgovornosti optuženog. Optuženi je krivično djelo počinio sa umišljajem, odnosno bio je svjestan djela i ujedno htio njegovo izvršenje, dok u odnosu na uračunljivost optuženog, takođe, nije bilo nikakvih sumnji. Nakon toga, prihvaćena je izjava o priznanju krivnje optuženog Antonić Miloša.

Sud je, uz saglasnost stranaka, odredio da se istoga dana održi i glavni pretres za izricanje krivičnopravne sankcije.

Na glavnom pretresu za izricanje krivičnopravne sankcije, na kojem su kao predmet pretresa iznesene olakšavajuće i otežavajuće okolnosti iz člana 48. Krivičnog zakona Bosne i Hercegovine, Tužilac je, ukazujući na ozbiljnost izvršenog krivičnog djela i posljedica koje su nastupile njegovim izvršenjem, predložio da se optuženom izrekne odgovarajuća kazna zatvora, zakonom propisana za ovo krivično djelo, posebno imajući u vidu da je optuženi omogućio nekolicini osoba sticanje protupravne imovinske koristi i da je došao u Bosnu i Hercegovinu isključivo radi izvršenja krivičnog djela. Branilac optuženog je, kao olakšavajuće okolnosti koje Sud treba imati u vidu prilikom izricanja krivičnopravne sankcije, naveo da je optuženi jako lošeg imovnog stanja, što je bio i glavni razlog za inkriminisana postupanja za koja je priznao krivnju, da se radi o osobi koja nije sklona izvršenju krivičnih djela, odnosno da ranije nije osuđivan, te teške porodične prilike (zdravstveno stanje članova porodice).

Prilikom odlučivanja o vrsti i visini krivične sankcije, sud je cijenio sve okolnosti relevantne za odmjeravanje kazne. Tako je, od olakšavajućih okolnosti na strani optuženog cijenio činjenicu da se optuženi korektno i iskreno držao pred sudom, da je priznao izvršenje krivičnog djela za koje je optužen, što je umnogome skratilo i pojednostavilo, krivični postupak, koji bi, u suprotnom, obzirom na sveukupne okolnosti, trajao znatno duže, što bi proizvelo i velike troškove krivičnog postupka. Od ostalih olakšavajućih okolnosti, koje su se stekle na strani optuženog, sud je cijenio da je optuženi porodičan, otac dvoje djece, da do sada nije osuđivan, da je lošeg imovnog stanja, kao i teške socijalne prilike u kojima se nalaze članovi njegove porodice.

Polazeći od postavljenih okvira svrhe kažnjavanja, iz člana 39. Krivičnog zakona Bosne i Hercegovine, kao i naprijed navedenih okolnosti, Sud je optuženom izrekao kaznu zatvora u trajanju od pet godina, smatrajući, pri tome, da je izrečena kazna srazmjerna stepenu društvene opasnosti počinjenog krivičnog djela i stepenu krivične odgovornosti optuženog. Sud smatra da će se izrečenom kaznom postići ciljevi kako opšte, tako i specijalne prevencije, odnosno da će ista vaspitno utjecati na optuženog da ubuduće ne čini krivična djela, a će se istovremeno uticati i na svijest građana o opasnosti i štetnosti krivičnih djela i opravdanosti kažnjavanja počinioaca.


Na osnovu člana 56. Krivičnog zakona Bosne i Hercegovine, optuženom će se u izrečenu kaznu zatvora uračunati vrijeme provedeno u pritvoru, počev od 15.09.2005. godine, pa nadalje.

Na osnovu člana 188. stav 4. Zakona o krivičnom postupku Bosne i Hercegovine, Sud je optuženog Antoniće Miloša oslobodio plaćanja troškova krivičnog postupka koji padaju na teret sredstava suda. Prilikom donošenja odluke o troškovima, Sud je imao u vidu loše imovno stanje optuženog, tako da bi plaćanjem troškova postupka bilo dovedeno u pitanje izdržavanje optuženog i članova njegove porodice, koju je dužan izdržavati, te da se optuženi nalazi u pritvoru.

Odluku o oduzimanju imovinske koristi, odnosno novčanog iznosa od 10.540,00 KM koji se nalazi na transakcijskom računu preduzeća „Antony Company“ d.o.o. Sarajevo br.1610000047990082 otvorenog kod Raiffeisen banke Sarajevo, Sud zasniva na odredbama člana 110. Krivičnog zakona Bosne i Hercegovine, obzirom da na to upućuje zakonska obaveza, a imajući u vidu činjenicu da je navedena imovinska korist pribavljena krivičnim djelom, odnosno na nezakonit način.

ZAPISNIČAR

Savin Bogunić



PRAVNA POUKA : Protiv ove presude dozvoljena je žalba Apelacionom vijeću ovog suda u roku od 15 (petnaest) dana od dana prijema.